

海寧王靜安先生遺書

三十四

臺灣國語教育史綱要

王冬

鏤板之興遠在唐世其初見於紀載者吳蜀也而吾浙為尤先
元微之作白氏長慶集序自注曰揚越閒多作書摹勒樂天及
予雜詩賣於市肆之中夫刻石亦可云摹勒而作書鬻賣自非
鏤板不可則唐之中葉吾浙已有刊板矣冊府元龜載後唐長
興中馮道李愚奏云嘗見吳蜀之人鬻印板文字色類絕多則
五季之頃其行轉盛及宋有天下南并吳越嗣後國子監刊書
若七經正義若史漢三史若南北朝七史若唐書若資治通鑑
若諸醫書皆下杭州鏤板北宋監本刊於杭者殆居泰半南渡
以後臨安為行都胄監在焉板書之所萃集宋亡廢為西湖書
院而書庫未燬明初移入南京國子監吾浙之寶藏俄空焉又
元代官書若宋遼金三史私書若文獻通攷國朝文類亦皆於
杭州刊刻蓋良工之所萃故鐫板必於是也至私家刊刻在東
都時已亘四部而宋季臨安書肆若陳氏父子徧刊唐宋人詩

集有功於古籍甚大至諸州刊板天水以後公庫郡庠仍世刊刻而紹興為監司安撫駐地刊書之多幾與臨安埒又四部以外湖之思谿杭之南山均有大藏全板元初刊西夏字全藏亦於杭州開局而一代大著述如胡氏資治通鑑音注王氏玉海皆於其鄉學刊行自古刊板之盛未有如吾浙者閩蜀二方方之褊矣宋元人所撰方志若寶慶四明志若新定續志若至正四明續志頗紀郡中板刻而他州闕如今最錄世有傳本及見於紀載者為兩浙古刊本考分郡羅列釐為二卷雖可攷見者十不得四五然大略可覩矣壬戌二月海甯王國維書

兩浙古刊本考卷上

海甯 王國維

杭州府刊板

甲北宋監本刊於杭州者

周禮疏五十卷

儀禮疏五十卷

春秋公羊傳疏三十卷

春秋穀梁傳疏十二卷

孝經正義三卷

論語正義十卷

爾雅疏十卷

以上並咸平四年

玉海至道二年判國子監李至請命李沆杜鎬等校定周禮儀禮公羊穀梁傳疏及別纂孝經論語爾雅正義從之咸平三年三月癸巳命祭酒邢昺代領其事杜鎬舒雅李維孫奭李慕清王煥崔偓儉劉士元預其事凡賈公彥周禮儀禮疏

各五十卷公羊疏三十卷楊士勛穀梁疏十二卷皆校舊本而成之孝經取元行冲疏論語取梁皇侃疏爾雅取孫炎高璉疏約而修之又二十三卷四年九月丁亥以獻十月九日命杭州刻板

又景德二年六月庚寅國子監上新刻公穀傳周禮儀禮正義印板先是有唐長興中雕九經板本而正義傳寫舛駁太宗命校刊雕印而四經未畢上遣直講王煥就杭州鏤板至是皆備

案宋初淳化中國子監刊五經正義不知命何地鏤板至咸平中七經正義則刊於杭州儀禮疏後有校勘經進官銜名其王煥結銜中有杭州監彫印板字樣足為玉海之證咸平刊本今皆不傳惟禮儀公羊爾雅三疏尚有南宋重刊本儀禮疏每葉三十行每行二十七字公羊疏三十行行二十二

三字至二十七八字爾雅疏亦三十行行三十字

書義十三卷

新經詩義三十卷

周禮新義二十二卷

並熙寧八年

咸淳臨安志詔熙甯八年七月詔以新修經義付杭州鏤板

史記一百三十卷

漢書一百二十卷

後漢書九十卷

並淳化五年

麟臺故事淳化五年七月詔選官分校史記前後漢書虞部

員外郎崇文院檢討兼祕閣校理杜鎬屯田員外郎祕閣校

理舒雅都官員外郎祕閣校理吳淑膳部郎中直祕閣潘慎

修校史記度支郎中直祕閣朱昂再校又命太常博士直昭

文館陳充國子博士史館檢討阮思道著作佐郎直昭文館

尹少連著作佐郎直史館趙況著作佐郎直集賢院趙安仁

將作監丞直史館孫何校前後漢書既畢遣內侍裴愈齎本

就杭州鏤板

宋書一百卷

南齊書五十九卷

梁書五十六卷

陳書三十六卷

魏書一百十四卷

北齊書五十卷

後周書五十卷

以上並治平二年

崇文院

嘉祐六年八月十一日

勅節文宋書齊書梁書陳書後魏書北齊書後周書見今國子監並未有印本宜令三館祕閣見編校書籍官員精加校勘同與管句使臣選擇楷書如法書寫板樣如唐書例逐旋封送杭州開板

治平二年六月

日

江安傅氏所藏宋刊南齊書有此牒

唐書二百二十五卷

嘉祐五年

嘉祐五年六月廿六日准中書門下劄子奉

旨下杭州鏤板頒行

天祿琳琅書目所著錄
宋刊本唐書有此二行

案北宋國子監正史如史記前後漢書南北朝七史及唐書
皆於杭州鏤板具有明文惟咸平三年校刊三國志晉書天
聖二年校刊南北史隋書不知下何處鏤板然自淳化至於
治平各史皆杭州所刊則此五史疑亦刊於杭州也今史記
前後漢書三國志唐書等尚有北宋監中殘本或南宋重刊
監本皆半葉十行行十九字

資治通鑑二百九十四卷目錄三十卷考異三十卷

元祐元年

元豐八年九月十七日准尚書省劄子奉 聖旨重行校定

元祐元年十月十四日奉 聖旨下杭州鏤板

外臺祕要方四十卷

熙寧二年

皇祐三年五月二十六日內降劄子臣寮上言臣前在南方

州軍連年疾疫瘴癘其尤者一軍有死十餘萬人此雖天令亦緣醫工謬妄反增其病臣曾細詢諸州皆闕醫書習讀除素問病源餘皆傳習偽書故所學淺俚貽誤病者欲望聖慈特出祕閣所藏醫書委官選取要用者校定一本降付杭州開板摹印庶使聖澤及於幽隱民生免於夭橫奉聖旨令祕閣檢外臺祕要三兩本送國子監見檢校勘醫書官仔細校勘聞奏至治平四年三月日進呈訖熙寧二年五月二日奉中書劄子奉聖旨鏤板施行

乙南宋監本

周易正文

尚書正文

毛詩正文

周禮正文

儀禮正文

禮記正文

春秋正經

左傳正文

公羊正文

穀梁正文

孝經正文

論語正文

右見景定建康志書籍類皆冠以監本二字此南宋監本也

然北宋胄監固已有單經本直齋書錄解題有春秋經一卷
每事為一行廣德軍所刊古監本也古監本謂汴都監本但
兼及他經與否殊無可考南渡以後則徧刊諸經不獨國學
即州郡亦然建康志所載九經正文尚有蜀本婺本建本新
定續志所載書板亦有六經正文則監中有單經本固其所
也

周易傳九卷略例一卷

尚書傳十三卷

毛詩傳二十卷

周禮注十二卷

儀禮注十七卷

禮記注二十卷

春秋經傳集解三十卷

春秋公羊傳解詁十二卷

春秋穀梁傳集解十二卷

孝經注一卷

論語集解十卷

爾雅注三卷

孟子章句十四卷

玉海紹興九年九月七日詔下州郡索國子監元頒善本校對鏤板

同上紹興二十一年五月詔令國子監訪尋五經三館監舊本刻板

李心傳建炎以來朝野雜記監本書籍紹興末年所刊國家艱難以來固未暇及九年九月張彥實待制為尚書郎始請下諸道州學取舊監本書籍鏤板頒行從之然所取多有殘闕故胄監刊六經無禮記正史無漢書二十一年五月輔臣復以為言上謂秦益公曰監中其他闕書亦令次第鏤板雖重有費不惜也由是經籍復全

魏了翁六經正誤序五季而後鏤板翻印經籍之傳雖廣而點畫義訓訛謬自若本朝胄監經史多仍周舊今故家往往有之而與俗本無大相遠南渡草創則僅取板籍於江南諸

州與京師承平監本大有逕庭而與潭撫閩蜀諸本互為異同而監本之誤為甚柯山毛居正義甫其於經傳亦既博覽精擇嘉定十六年春朝廷命胄監刊正經籍司成謂無以易義甫馳書幣致之盡取六經三傳諸本參以子史字書選粹文集研究異同凡字義音切豪釐必校儒官稱歎莫有異辭由歲間刊脩者凡四經乃猶以工人憚煩詭竄墨本以紿有司而板之誤字實未嘗改者十二三也繼欲修禮記春秋三傳義甫以病目移告事遂中輟

岳珂九經三傳沿革例監中見行本不無訛謬脫略之患

原注監中

大小本有三歲久磨滅散落未有能修補之者

周易正義十三卷

尚書正義二十卷

毛詩正義四十卷

周禮疏五十卷

儀禮疏五十卷

禮記正義七十卷

春秋左氏傳正義三十六卷

春秋公羊傳疏三十卷

春秋穀梁傳疏十二卷

孝經正義三卷

論語正義十卷

爾雅疏十卷

玉海紹興十五年閏十一月博士王之望請羣經義疏未有板者令臨安府雕造

建炎以來朝野雜記先是王瞻叔

即之學字

為學官嘗請摹印諸經

義疏及經典釋文許郡學以贍學或係省錢各市一本置之於學上許之令士大夫仕於朝者率費紙墨錢千餘緡而得書於監云

案北宋監本經史既為金人輦之而北故南渡初即有重刊經疏者如日本竹添氏所藏毛詩正義乃紹興九年九月十九日紹興府雕造此事是否奉行是月七日詔書抑或先已刊刻別無可考又刊經疏者紹興之外尚有婺州所刊春秋

左傳正義温州所刊爾雅疏雖未審在何時至紹興十五年
令臨安府雕造羣經義疏未有板者則高宗末年經疏當盡
有印板矣此種州郡刊板當時即入監中故魏華父岳倦翁
均謂南渡監本盡取諸江南諸州蓋南渡初監中不自刻書
悉令臨安府及他州郡刻之此即南宋監本也明黃佐南雍
志經籍考所載舊板有周易註疏十三卷儀禮註疏五十卷
春秋正義三十六卷春秋公羊傳疏三十卷春秋穀梁傳疏
十二卷爾雅註疏十卷雖其名或稱正義或稱疏或稱註疏
然其卷數皆與北宋單疏合而與南雍之十行本註疏不合
當即南宋重刊之單疏舊板以其板久闕不印又明人但知
有註疏不知有單疏故即以註疏目之證以爾雅疏事甚明
白案爾雅疏世有三本一袁壽階藏本後歸黃堯圃者即阮
文達爾雅註疏校勘記所據文達言多元時補板二陸存齋

藏本用元至順公牘紙印三陳仲魚藏本今藏烏程蔣氏者
用洪武江南公牘紙印而欽宗嫌名莖字高宗嫌名構字均
闕一筆自是南宋刊本又多宋元明三朝補葉其即南雍志
之爾雅註疏十卷蓋無可疑以此推之則南雍志之周易儀
禮春秋三傳諸疏卷數同於單疏而不同於十行本註疏者
即南宋監本單疏可斷言矣南雍所有十行本註疏板本無
儀禮爾雅二種故自元至明尚補綴單疏本以彌其闕是以
此二種後世猶有傳本他疏自元以後殆已不復印行矣

周易程氏傳六卷

周易義海撮要十卷

景定建康志書籍易類有監本程氏傳監本義海

淳熙禮部韻略五卷

淳熙五年

玉海淳熙元年國子監言韻略前後有增改刪削及多舛舛

詔校正刊行

增修互註禮部韻略五卷

魏了翁跋毛氏增韻云三衢毛氏增韻進御之六十二年其子居正義夫膺大司成校正經籍之聘始克鋟梓於胄庠然人情異嚮趨簡厭煩故校其始著尚多刊削世之不過者非特一增韻也

史記一百三十卷

漢書一百二十卷

後漢書一百二十卷

三國志六十五卷

晉書一百三十卷音義三卷

宋書一百卷

南齊書五十九卷

梁書五十六卷

陳書三十六卷

魏書一百十四卷

北齊書五十卷

後周書五十卷

隋書八十五卷

南史八十卷

北史一百卷

唐書二百五十卷